



3 minuti di lettura

Finalmeint in Arabia anca ill donn i pudran ciapà la pateinta, giüst atsé.

L'üguagliansa cun i'omm l'è un diritt sacrusant e gariss da iess atsé dapartütt e par tütt ill rob.

Tant par cuminciä i caruser dal post i'han decis da pruclamä cul dé lé fésta nasiunäla dla categoria.

L'è mia sultant una question ad pateinta parchè anca lamò adessa i pudran pèrd dill mes' giornä par cattä la ciäv in dla bursëtta, rituccäs al trücch intant ca ien feram al semaforo, däs una sistemäda all'acconciatüra o magäri una spulveräda al crüscott intant chi aspettan un sò amisa con un brisinein ad ritärdi.

Anca lamo' as pudrà vèd una quälca donna ca taca da liid cul self-service o cl'as guärda in gir in dla speransa c'arriva un'alma gentila a däggh una man, almenu par savì s'agh vòl la nafta o la bensina.

Anca lur finalmeint i pudrann pruä l'emusion da girä seinä mèt föra la frèccia e pudì accumpagnä la svolta cun la culonna sonora di clacson ca söna e dill marianass ca vula via. Sicürameint impararan alla svélta a cicciarä cun l'amisa da pärt rigurusameint a trenta all'ura e in mesä alla strä, a surpassä i ciclista talmeint a tacca che la biciu la ciapa 'l culur ad la macchina.

Par iess mia da menu al rèst dal mond i farann di pustegg' fantasius, i ciaparan la msüra in möd e manera d'ocüpä 'l post ad du macchin e se par cäs i sücan i saran bon da negä ogni respunsabilitä dadnas al pär o al marì. Bravä cul navigatur la dvintarä una priuritä anca lamò parché sia mäi dit che lü anna sà pösé che lur in sla strä 'gh'é da fä.

Am risülta che tütt i mecanich i garan, ubligaturameint, da partecipä a di curs pr'imparä a capì cusa s'é rutt o cusa ciocca quand is preseintaran lamò e pudì dä una quälca spiegašion cumprensibila e intant chi gh'èn slungä un po' d'oli in dal cambi e in dla frision.

Anca i'arab i pudran vèd un quädar che noi um vist una müccia ad vot e ciué una macchina férma da pärt alla strä con una donna cla guärda piina ad ricunuscinsä un om sädä möi cal cambia la gumma e al prüva gnan a spiegä ca l'è mia atsé difìcil tant la prossima vòta la catarä un ätar luccon cal sa férma. Anca i prüfil dill citä i cambiaran parché i märciapä i pardaran tütt i'angul, quälca "panettone" longh a sücäl al ciaparä la furma d'un öv ad Pasqua e i guardrail i sa smeiaran a di quädar ad Picasso. Par fä propi ill rob cm'as dev seins'ätar i giraran in scüron seinsa pisä 'l lüs e i mandaran in sla furca quälca povar diävul cal lampegiarä par mëtagh una pülga in dl'urìccia e quand i vadran un post ad blocch in un amen i cuntrularan sa ien miss alla via un po' bein e i prepararan al suris' pösé smagliant cuminciand a sbarbatä ill parpell.

Par i'om invece cambiarä gninta (bein...quäsi) e i pudran siguitä andä cmé di dišgrasiä, tirä di sacranon ca fä lüs, pinsä da ies i padron dla strä e suartütt scaculäs, fä sö 'l ballein e träl föra dal finestrein, anca cun la rima.

*Pietro "Pedar" Rebecchi*